

ITRON-VARIA LOURD

War don : *Elez deuz ar Baradoz...*

I

Gwerc'hez, mam a garanté ha leùn a vadélez,
 A bel brò omp diréded d'hô kwélet, Rouanez.
 En Lourd é man ar vomen deuz a c'hraso Doué ;
 Breiziz zo deùt d'hô pédin ; bézit out-hé true.

II

Ar vrùd deuz hô madélez ha deuz ho purzudo
 A zô et a bell amzer dré bévar c'horn ar vro ;
 Ken braz eo hon faourté en déwez a hirié,
 M'ac'h omp a bel dirédet d'ar feunteun a vué.

III

Klan a gorf, klan a galon, ha mui c'hoaz a iné,
 Ni zô bréman dirazoc'h, ô Mam a garanté !
 Mar teurvéet hon sélaou, hon faréin, Gwerc'hez,
 Ni gendalc'ho d'hô meûli bété fin hon buez.

IV

Da Vreiz-Izel ha d'ar Frans kendalc'het ar gwir fé,
 Unanet ar bob kristen en karanté Doué ;

Da Bi nao, ar Pab santel, hénor ar gristénien,
C'houi asténo ar vué, iac'héet hé anken.

V

Ar wabren a zo téval ; a bep tù zò arné ;
Ar béd a zo trubuliet ha dré oll ha bemdé ;
Ni gleo ar bâr ô tostât hag ar môr ho krôsa ;
Mar na deût c'hui d'hon difen ni n'hellomp ket stourma.

VI

Deut éta, Gwerc'hez santel, feunteun ann oll c'haso,
Da skuil voar ho pugalé hoc'h oll madélézo.
Gret dreist péb tra ouz Doué ma sentfomp gant préder :
'Wit ma c'héfomp d'hé veûlin épad ann oll amzer.

**Ar gwel deuz ar ménézio hag iliz kaër
Itron-Varia Lourd.**

VII

Setu ni aman, Gwerc'hez, é harz ar ménézio
A zav huel ho c'hriben, é trézeg ann Envo ;
Hoc'h iliz-veur a wélop a grap ouz ann dosen,
Hag hé zour dantélézet dap béték ar goabren.

VIII

Iliz kaër, Iliz santel, karget a vurzudo
A skuil bembez divuzul Rouanez ann Envo
War ar péc'her reuzeudik, daonst pégen fall a vé,
Pa deu gant keuz d'hé béc'het, da c'houlén trugaré.

IX

Na hell na komz na pédi, mantret eo hé galon !
A boan eo d'ehan kaout nerz da c'houlén he bardon ;
Mari, mam a garantez, mamen ann oll c'hraso,
A zigor hé galon baour, kerkent a skuil daëro.

X

Ar bélerinet nerzet, ganec'h, Gwerc'hez Vari,
A lavar n'eur daoulinan, aman éma hon zi ;
Pa-z-eo ti hon Mam garet, ar gwir Vam a zrué !
He bugalé zo er ger ! kaëran joa, ma Doué !!!

XI

Evel ann oabl o skédi hag ann heol o para,
Luguern oc'h iliz névé, ô Mam ann dénéra ;
Den n'halfé konta biken ann treo kaer zo en-hi !
Gwel eo dimp pléga hon fen ha stouin da bédi.

XII

Ni ho ped a greiz kalon éwid hon bugalé,
Sikouret an-hé, Gwerc'hez, da c'heuil lézen Doué !
Ni bed 'wid ann dud noajet hag ann dud er gozni,
Ewidom-ni hon unan ha 'wid oll dud hon zi !

XIII

Ewit ar Frans mastaret gant fank hé dizurzou,
Ma reï eberr pinijen démeus hé féc'héjou ;
Ewid ann Iliz santel zo dré oll trubuliet,
'Wid ann Tad santel ar Pab gant ré vraz dilézet.

XIV

Ewid ar béc'hérien gez, ma trofoint ouz Doué,
Digoret ho daoulagad war zu ar wirioné,
Ma welfont ho gwal vuez, ma réfont pinijen
'Wid ma zimp oll a vagad d'ho meulin da viken.

XV

D'ar ger ec'h éomp bréma joaüs, Gwerc'hez santel,
Nan, biken, n'oc'h ankoafomp, pa vimp é Breiz-Izel ;
Dré eur voez ni lavaro é pévar c'horn hon bro :
N'heller ket gwélet kaeroc'h anez mont d'ann Envo.

ERVOAN HERNOT,
Marc'hek a urz Zant-Grégor..

Lann-Huon, ann 23 a vis gwengolo 1874.

Imprimatur :

Brioci, die 2a Julii 1875.

AUGUSTINUS.

(Propriété.)

AVIS. — Ce cantique se vend à la librairie de M^{me} V^e LE GOFFIC,
à Lannion.